



命運毋係所有

臨暗个日頭，斜斜晡到戶檻內肚來，微微个日頭絲肚，一團細細絨絨个花籽，盪啊盪，一下高一下低，尋厥落腳所在。細細个身胚，承載該千古不變个任務，風載緊佢，牆頭屋角巡透透，背尾，在禾埕个必縫所在停腳。

一陣風，一陣雨，燒暖个日頭掌醒絨毛球樣个花籽。擘開目，伸下腰，「啖！」幼幼个白根，探出頭咧！天頂个日頭寶貴佢，用金色光替佢化妝，點青，點黃，還過加一層白含，嫩嫩个新生命伸根開葉，正式加入大自然个一環。天地有情，對佢，對每一粒花籽做下都平心照顧，待遇相同。毋過，成長過程中有个順勢，有个艱難，關鍵在一開始个選擇，你千擇萬擇，係擇著仰脣樣个位所來落腳？這係因緣也係命運，尋著好條件，你斯順順利利成長，開花打子，延續下一代，萬一你生根个所在，係燥埔，係石頭縫，仰結煞諾？生命單淨分你一到機會，任務旨煞个你，還係愛牙根齧緊，耐心等該好機緣來到，時到咧共樣也會暴芽綻筍。

看哪，該壁縫石頭空項个花花草草，枝桠雖然燥旱，毋過逐頭蹬蹬企，花蕾雖然少肥無人顧，毋過佢也逐蕊靚妮妮。環境毋好，並無干礙佢開枝散葉个決心，為著愛生存，愛成長，堅韌个生命，深深扎根，莖也枝枝硬程，一到過一到个大風大雨，鍛鍊厥个身胚，分佢緊來緊砸礮緊壯旺，毋驚你擲，毋怕人躡，時到咧，毋打眼个佢還在開出靚花，花籽跔風飄散四向角頭，生命个循環，斯係恁泥生生不息，分人讚嘆。

偲人也共樣，一落泥斯帶有無相同个命運，你可能係眾人愛惜个金團寶，也有可能係無人承受个路邊草。不管好命抑係歪命，毋使歡喜，毋使怨怪，上天个鋪排，總有偲人揣毋來道理。這下个你順勢無？請你看看路脣壁縫个細花細草，生命个虛玄，斯在該裡肚。

作者：劉玉蕉

☆詞彙學習☆

- | | |
|---|--|
| 【戶檻】fu ^ˇ kiam ⁺ ：門下方的橫木。也叫「門檻」。 | 【暴芽】bau ^ˋ nga ^ˋ ：發芽。 |
| 【寶貴】bo ^ˆ gui ^ˋ ：疼愛珍惜。 | 【干礙】gon ⁺ ngoi ^ˋ ：妨礙。 |
| 【白含】pag ^ˋ ham ⁺ ：白色摻雜其中。 | 【毋打眼】m ^ˋ da ^ˆ ngien ^ˆ ：不起眼。 |
| 【靚妮妮】zian ⁺ nid ^ˆ nid ^ˆ ：漂亮得不得了。 | 【還在】van ^ˋ cai ^ˋ ：依然。 |
| 【四向角頭】si ^ˋ hiong ^ˋ gog ^ˆ teu ^ˋ ：四面八方。 | 【虛玄】hi ⁺ hien ^ˋ ：奧妙。 |

☆文法學習☆

- 【一到過一到】rhid^ˆ do^ˋ go^ˋ rhid^ˆ do^ˋ：一次又一次。「過」在此處為「又、再」之意，表示動作反複進行、累加，例如：「過食一碗飯」（再吃一碗飯）、「過擎一張凳來」（再搬一張板凳來）。「過」亦可表示「重來」的意思，如：「掙撇寫過」（擦掉重寫）、「擎過一張凳來」（換過一張板凳來）。